

HARANGVE

AV PEUPLE  
DE FRANCE SVR LES

LOVANGES DES ANCIENS  
François, & de nostre Treschrestien Roy  
de France, & de Poloigne Henry 3. n'a-  
gueres empesché à repousser les estrangers,  
pour la manutétion del'Estat, & resiouif-  
sance de son heureux retour en sa ville de  
Paris,

*Presentee à sa Majesté, par M. Pierre Poisson,  
sieur de la Bodiniere, Angeuin.*



A PARIS,

Chez Denis Cotinet Imprimeur, près la  
porte S. Marceau, à la Pie.

1 5 8 8.

CASE

F

39

.326

1588 o/p

THE NEWBERRY  
LIBRARY



# *H A R A N G V E A V P E V P L E*

*de France, sur les louanges des anciens François,  
& de nostre Treschrestien Roy de France, & de  
Poloigne Henry troisieme, n'agueres empesché à  
repousser les estrangers, pour la manutention de  
l'estat, & resionissance de son heureux retour en  
sa ville de Paris.*

Presentee à sa majesté, par M. Pierre Poisson, sieur  
de la Bodiniere Angeuin.



Ouent arriue, tres-hon-  
norez, & inuictissimes  
François, que la crainte  
empêche d'oser ouurir la  
bouche pour prononcer,  
ou mettre la main à la plu-  
me pour escrire quelque  
honneste remonstrance publicque : Mais  
quand on se represente deuant les yeux l'hu-  
manité, douceur, & clemence, de laquelle  
ont accoustumé vser les gens d'honneur en-  
uers ceux que lon cognoist estre meus d'un  
bon zele, & affection à la Republicque, on

## HARANGVE AV PEUPLE

ne craint sous celle seule ombre se fortifier, & despouiller ceste vaine honte puerille, mesmement en se proposant d'apporter vn subiet agreable, & digne de voz oreilles, à vous mes Seigneurs François. Ces belles louanges, & heroiques vertus de nos ancestres, & de nostre treschrestien Roy Henry, lesquelles encores qu'elles vous soyent notoires, ce neanmoins veu qu'en la recordation d'icelles (comme le passé est vn augure trescertain de l'aduenir) il ne se peut faire que ne soyez aiguillonnés, & émeus d'auantage, en ce temps principalement si miserable, plein de troubles, & guerres ciuilles, auquel pour apporter quelque bon remede, chacun considerera à part soy, & jugera que la resouenance des louables, & insignes vertus de noz deuanciers nous sont maintenant tresrequisés, & necessaires. Et pour sy disposer d'où est-ce que lon doit prendre meilleur commencement que de l'etymologie du nom François, qui a signification de franchise, & d'hommes francs affranchis de tout vice, & seruitude, robustes, & non effeminés, de cœur magnanime, vertueux, & vaillants en toutes varietés de valeureux exercices, & speciallement au faict des armes? Au liure du



Panegiric de l'Empereur de l'Occident Cōstantin le Grand, sont escris ces mots. Il est facile d'auoir victoire des Grecs gens timides, & couards, & de toutes les nations du pais d'Orient doux, & delicieux, mesmemēt des Meridionnaux, & Septentrionnaux peu constants, de petit courage, & non assurés; mais des François il en va bien autrement. Car ilz sont arrestez au combat comme rochers immuables, & n'estiment l'honneur de leur vie qu'en mourans en quelque bonne bataille pour la defense de la iustice de Dieu, & de l'innocent. Cette grande hardiesse, & magnanimité les a tellement maintenus, que iamais nulles autres nations ne les ont peu assuiettir, l'Empereur Valétinian 2. par leur aide, & secours s'estant rendu maistre, & Seigneur de la nation des Alains, essaya puis apres de les rendre tributaires au peuple Romain, comme ceux des autres prouinces plus grandes, & peuleuses, ce qu'il ne peut faire, & malgré luy demourerent francs, & libres. Dont est auenu que en commun langage ce nom de François a tousiours retenu avec soy sa signification d'hōme franc, libre, & exēpt de toute seruitude. Les François ont en cette liberté de vie franche & noble, esté tousiours

# HARANGVE AV PEUPLE

tresfidelles, & obeissants à leur Prince naturel, tellement que pour la defense d'iceluy, soustenement de la religion Chrestienne, & vtilité de leur patrie, ils n'ont iamais esparagné tous leurs moyens, leurs vies, & facultez, celle de leurs enfans, & la perte de leurs biens. A raison dequoy à l'aduènement, & couronnement de leur Roy, ils auoient cette coustume, que les principaux d'être eux l'enleuoient, & portoient sur les espaulles, l'ayās posé sur vne rudache, avec grande resiouissance, qui estoit vne ceremonie significative de l'affection, & amour qu'ilz luy portoyent, & comme par maniere de dire, & de pied, & de main, & d'une tresgrande alegresse estoient prests à le supporter contre les estrangers, & obeir à ses commandemens. Ce que par effect ilz ont testifié, & monstré de temps en temps, ainsi qu'il se lit d'eux es histoires. Car de quel hardy courage ont ils accompagné leur 2. Roy Merouée, lors qu'il fit son entrée es Gaulles, à fin de rentrer en leurs païs, dont ils auoient esté dechassés par les Romains? A quoy ils furent si obeissans à leur Roy, qu'ils ne furent aucunement estonnés ny de la resistance qu'ils y trouuerent, ny de la difficulté, ny de quelque hasard que ce fust: ains tous-

iours assisterent à leur Roy, lesquels par ce moyen non seulement chasserent les Romains des Gaules (domicille ancien de leurs maieurs.) Mais aussi ceste nation feroce des Alains, qui les auoient occupées, & ne furent moins affectionnés au Roy Clouis en la guerre contre les Vissigots, qui s'estoyent logez en la contree d'Aquitaine. Car ce leur estoit chose fascheuse de les souffrir estans infectés de l'heresie d'Arius, dont Clouis, (qui a esté le premier Roy Chrestien des François) tua de sa main au combat le Roy des Vissigots, & non contant de ce, comme ces Vissigots se voussissent rallier, & recommencer de plus belle la guerre contre les François aupres de Bourdeaux, le Roy Clouis, accompagné de ses loyaux subiects François, les poursuivit de telle furie, qu'il en defeat vn si grand nombre, que le nom de la place, où fut la defaite, s'est tousiours depuis nommée le champ des Arriens. Par ceste signalée victoire le royaume de France a esté estendu iusques aux monts Pyrenées. Mais ie serois trop long, & ennuyeux, si ie voulois poursuivre de rang en rang tous les anciens exemples, venons aux plus prochains. Sous le regne de Pepin, & Charlemaigne son fils, qu'elle volonté les

HARANGVE AV PEUPLE

Frāçois ont ils eüe enuers eux, quelle amitié leur ont ils portée, quelle obeissance? Certes si grande, que d'un commun consentement, & comme à l'enuie à qui mieux mieux chacun les suiuit au voyage d'Italie, pour faire deliurer le S. siege Apostolique des Roys de Lombardie, qui tenoient Rome assiegée, là où les François en la faueur du Pape, vserent par tout où ilz passioient es terres des Lombards, de toute hostilité, mirent tout à feu, & à sang, desgasterēt, & raserent toutes les places: firent tant en fin que par ce moyen ils contraignirent les Lombards de leuer le siege de deuant Rome. Et d'auantage les François prirent toutes les villes qu'ils auoient vsurpées en Italie sur l'Empereur d'Orient, ensemble se saisirent de celles, qui estoient de l'Exarchal, ou bien appartenans au lieutenant de l'empereur audit païs d'Italie. Toutes lesquelles villes apres que Pepin, & Charlemagne successiuent eurent mis en leur obeissance rendirent audit S. Siege Apostolique, en la faueur duquel ils auoient prins les armes: de maniere que c'est à bon droict, que les Roys de France ont depuis esté honorés du nom de Treschrestien, ayans ainsi esté affectionnés au S. Siege Apostolique, &  
iccluy



iceluy enrichy par leur liberalité. Encores d'auantage les François se sont montrés zélés au soustenement de la religion Chrestienne en la guerre contre les Sarrazins, sous la mesme conduite desdits Pepin, & Charlemagne, là où en vne seule bataille ils en firent iusques au nombre de 500. mil, & en fin contraignirent ce qui resta d'eux, retourner hastiuement au país d'Espagne, d'où ils estoient descendus en France. Venons encores au temps plus proche de nous, delaisans toutesfois plusieurs autres exemples de la fidelité, & obeissance des François enuers leur Roy. Car le temps ne suffiroit à les raconter. Que dirons nous au temps du regne de Philippes fils de Henry premier de ce nom Roy de France, en l'an de Iesus Christ 1096. de quelle promptitude, & fidelité les François ont ils vsé enuers leur Roy, en vne si sainte entreprise: lesquels ny la douceur de leur patrie, ny l'amitié de leurs femmes & enfans, n'ont empesché faire voyage en pays loingtain, sous la conduite de Godefroy de Billon, Duc de Lorraine, pour faire la guerre aux Turcs, & Sarrazins, ennemis de nostre foy Chrestienne, iusques au pays de la Palestine, tant estoient affectionnés à nostre vraye re-

# HARANGVE AV PEUPLE

ligion, ou apres auoir obtenu plusieurs victoires ils paruinrēt iusques en Hierusalem, dont ils courōnerent Roy iceluy Godefroy de Billon, & encores depuis en l'an mil deux cens aydez des Venitiens furent non seulement maistres & Seigneurs de la ville de Hierusalem, pour la 2. fois, mais aussi de plusieurs autres villes au pais d'Asie, voire de Cōstantinople, ville capitale des Sarrazins, laquelle ils remirent entre les mains de leur Empereur Alexis le ieune, à fin que les François monstrassent que leur naturel est apres leurs victoires, d'estre clemens, & misericordieux, & non pas cruels: combien que pour le mauuais traitement qu'ils auoient receu des Turcs, & autres nations barbares, ils eussent occasion de se reuencher. Passons encore plus outre. Soubs le regne de S. Louys ils ont laissé en plusieurs endroits tesmoignage certain de la sincere affection, qu'ils ont accoustumé porter à leur Prince, lequel nō obstant qu'il fust totalemēt adonné à deuotion, ce neantmoins ne laissoit d'estre belliqueux, & n'est demouré inutile en son palais, ains a voulu souuentefois experimenter le hazard, ou, comme on dit comunēmēt, courir la fortune de la guerre, pour y faire espreuue de sa vaillance, ayant dressé ses ar-

mées en Syrie, Afrique, Carthage, & au Roy-  
aume de Thunes, ou en ses batailles il n'a  
pas tousiours eu du meilleur, suiuant ce que  
lon dit coustumierement, que les armes sont  
journalieres. Mais venons au Roy François  
premier, & ayeul de nostre Roy Henry à pre-  
sent regnant, duquel la vertu incomparable  
au faict des armes, la deuotion à la religion,  
le zele à rendre iustice, la science aux lettres,  
la liberalité enuers ceux qui le meritoient,  
le meur conseil, & grande sagesse en toutes  
ses affaires, l'ont rendu si admirable, plein de  
louange, & gloire perpetuelle, qu'il est im-  
possible de dire combien il a esté reueré, ai-  
mé, craint & obey de ses suiets, soit au temps  
de paix, ou pour estre bien suiuy en temps de  
guerre. Reste à parler de ce grand Roy Hen-  
ry 2. pere de nostre Roy Henry 3. à present  
regnant, duquel la pieté, & vertu militaire,  
force, & prudence ont esté si admirables, qu'il  
est presque impossible de les raconter: aussi  
que la memoire en est si fresche, qu'il n'est  
besoin en dire d'auantage, estās encores im-  
primés au cœur d'un chacun, la mort duquel  
arriuée en acte genereux, d'un exercice pro-  
pre aux monarques & cheualiers valeureux  
en la iouste d'un tournoy, est à bon droit

# HARANGVE AV PEUPLE

plainte , & regrettée , duquel les enfans, François 2. Charles neuuiesme, & Henry troisieme à present regnant , ont suiuy de pres les vestiges: Mais leur bas aage, venans à la couronne, à rendu ce siecle ainsi turbulent, comme il se voit aujourd'huy. Voila neantmoins par le discours cy dessus, comme la nation François, belliqueuse, endurcie à la fatigue de la guerre, supportee d'antique noblesse, obeissante à leurs Roys, affectionnee au soustenement de la religion Chrestienne: depuis le Roy Clouis florissante en bonnes mœurs, sages loix, & police, enrichie de sciences literales, & de tous arts mécaniques necessaires à la Republique, ententue à la multiplication de leur famille, & à la bonne instruction, & nourriture de leurs enfans, a par tels moyès esté crainte, reuerée & louée des nations estrangeres, & leur Monarchie conseruee par l'espace de presque mil cinq cens ans, sans qu'elle ayt esté diminuee, ny esbranlée aucunement: mais plustost par la vaillance de leurs Roys, & obeissance susdite de leurs subiets, de iour en iour augmentee, & dilatee: laquelle si longue duree ne se trouue en aucune autre Monarchie. Vray est que ce nom de



François n'a esté donné des le commencement à leur nation, ains se trouue par les histoires auoir esté nommez de temps en temps de plusieurs autres noms: principalement ceste nation est celle qu'anciennement on nommoit Sicambres, ce qui se verifie par l'asseuré tesmoignage de S. Remy, ou au baptesme du Roy Clouis, ou S. Remy vse de ces mots, baïsse le col, ô Sicambre, adore ce que tu as bruslé (qui sont les Chrestiens) & brusle ce que tu as adoré (qui sont les Idoles, au seruice desquelles il s'estoit addonné.) Or entre ces Sicambres, il y a eu entre autres vn Roy fort celebre, nommé Basan, lequel avec grande auctorité a gouuerné son sceptre, pour auoir esté grand obseruateur de la iustice. En signe dequoy il faisoit porter deuant luy vn cordeau, & vne espee: fut si seueré exacteur d'icelle, qu'il ne eust pas pardonné à son frere, ny mesme à son fils, s'ils eussent transgressé les loix de la Iustice, par lesquelles tous brigans, larrons, adulteres, trompeurs, & deceueurs estoient punis de mort sans remission. De maniere que si quelqu'un commettoit quelque delit, ce proverbe couroit entre ses subiets, comment entre les Sicambres? Côme s'ils eussent

HARANGVE AV PEUPLE DE FR.  
des mains de ces felons estrangers, Dieu per-  
petue ton bõ heur, tu as enduré à vne si belle  
poursuite, tant de fatiques & ennuis mar-  
tiaux, pour nous deliurer de ceste vermine  
estrangere, maintenant nous prions ce sou-  
uerain Dieu qu'il te conserue en repos, ô  
que nous sommes heureux, & toute la Re-  
publique Francoise de t'auoir pour nostre  
Roy, ô que Dieu s'est monstré iuste & equi-  
table de t'auoir sauué la vie, que tu as expo-  
sée en vn acte si saint & belliqueux : Nous  
ne craignons plus desormais de succomber,  
nous sommes tous asseurez, tu honoreras le  
nom des Vallois, tu en es trespigne : Tu n'es  
moins digne du nom d'Auguste qu'a esté  
Octaue, comme representant sa vertu, ô que  
grande est ta pieté, prudence, & iustice.  
Nous priions doncques ce souuerain Dieu  
que tu sois tousiours victorieux contre tous  
tes ennemis, & que tu viues en bonne santé,  
& nous sois longuement Roy.

F I N.



THE  
NEWBERRY  
LIBRARY